



東三省政略卷一

邊務 目錄

夾皮溝篇

附圖

紀樺甸縣設治

紀韓登舉事實

紀新舊礦洞地勢

附採金土法

附王崇文自吉林至夾皮溝紀程

附礦產區域表

附森林處所表

附植物出產表

夾皮溝篇

吉林省以長白山爲障松花江爲池金湯之勝甲三省然外人駸駸逼處者固注目於形勝之險要而亦垂涎於礦藏之宏富夾皮溝爲吉林省金礦孕毓之區雖以

王基發祥支脈例應封禁而區域幽邃詰察難周致任小民私採由來久矣光緒三十三年八月飭候選道王崇文前往調查月餘竣事歸呈其報告各稟牘其循塗所經由吉省循松花江行一百八十里至大鵬溝地方沿途山巒起伏絕少平曠再進而爲韓登舉所營業地由此至夾皮溝計程二百四十里更南則至長白山大沙河古洞河等處直與高麗毘連惟由大鵬溝行四十八里至木奇河再進皆羊腸鳥道僅能容騎林深箐密非由登舉爲導則鮮或識塗登舉者固假練總之職而雄於一方者也東省向苦地廣人稀凡農工商各業每招山東登萊青人任其勞其來也必有所謂把頭者或受僱主之委託或輸出己資以招集流亡分執其役彼乃坐收羨餘以爲利韓氏亦山東人之充把頭者盤踞既久聲氣自廣積漸至今韓邊外之名幾洋溢於外人耳目說者輒以爲養蠶之可慮雖然亦視官家操縱何如耳夫西人內治

政策首重殖民然其始也亦聽夫一二小民之有識略者胼手胝足自求隙地謀自殖計迨基礎已立趨赴漸衆國家乃從而羽翼之扞衛之推施其宗教禁令以部勒之遂蔚然成一大都會是以國無不治之地地無不殖之民此固西史之班班可考者今韓登舉以把頭起家能擁千萬人之衆箝制束縛使之或就墾或就礦或樵采無事則各安其業有事則守望相助殆亦具西人殖民之識略歟夫東省疆宇遼闊赤地千里談政治者僉主移民之說而官家力不能給若能如登舉之所爲夾皮溝如是而類乎夾皮溝者無不如是東省不惟無不可殖之地且無不可移之民矣夫私採礦產誠足爲登舉罪然於外人垂涎欲得之物登舉出而力爭先著使之利不外溢是登舉不惟能殖民也移民也並有保全土地之功矣國家亦何不可利用之哉雖然自日俄交關以後俄人失敗暫作退處之勢而日人逼處高麗隱煽其民從頭二道江一帶越境墾荒負耒耜踵接於道是其包藏禍心以爲得尺得寸之計夫固瞭如指掌矣且兩國之眈眈窺伺者既不憚緇幽鑿險隨地偵察又不惜珍物厚幣隱與登舉相饋遺潛爲勾結登舉能否堅其心志爲我國家所利用且不可必然

則爲今日計欲固邊防必先保全夾皮溝欲衛礦產必先拊循韓登舉蓋夾皮溝一帶地軸縱橫約二十餘萬方里蓄富有之資扼衝要之險外人既垂涎於其礦即不得不垂涎於其地今宜亟就溝之上下游清理地面區分經緯設州縣治以相維繫韓氏之田原財產室家宜籍籍之而任保護之責至於該境之戶口裁判練勇各項事有關於治安者均宜設官以分治之一切苛細律令悉爲捐除俾得相安於無事既有恒產自有恒心若是則地利不致旁失豪猾免爲虎俚是篇所載或以爲籌邊者問津之助因並錄其調查所誌各類附於後以備參考焉

紀樺甸縣設治

自有韓邊外之名而夾皮溝上下數百里居民耳目說者皆謂知有韓而不知有官推原其故

國家於長白山一帶封禁夙嚴野無居人將焉置吏是以神臯隩區幾同甌脫迨局鑰既弛客民流徙輾轉依附屯聚既多紛囂糅雜登舉出而部勒之使之各得其所迭遭外讐復募集練勇以自衛斯時也民之所見幾信有韓之指揮號令而已然則欲減殺韓勢整飭治權非先於近溝處所規畫區域增設官吏不足以正

王畿疆索之名而杜外人窺伺之漸光緒三十三年十一月奏請距夾皮溝東南樺皮甸子循頭二道江以及古洞河大沙河一帶添設知縣一員名曰樺甸縣奉

旨允准旋飭直隸候補知府李慶璋往經其始初擬在官街爲設治地緣該處夙係山鎮人煙尙屬稠密嗣又派員詳細履勘審度地宜據稱官街地方失之偏西爰查長白山勢自十九溝以東折而向北蜿蜒千里濛江之東爲長白山正頂則樺甸縣東南當爲長白山東北麓今既設官分治自應首論形勝次求本地利源他日可臻富庶者

始克定爲千百年之基礎若移治於松花江之濱樺樹林子其地扼木奇河之要隘而爲入夾皮溝羊腸歧徑之門戶其南松花江輝發河交流貫注所有長白山一帶森林巨材均可結筏蔽流而下他日林業之興必以該山爲巨埠形勝利源兼而有之其爲設治事宜迭經兩省往復會商議乃決該縣轄境大致東以敦化縣界之新開道嶺爲界南以兩江口爲界西以磐石縣境之柳樹河西崗爲界北以吉林府境之馬蜒河嶺爲界東南以奉吉新劃之金銀別嶺爲界西南以濛江州界之那爾轟嶺爲界東北以吉林府界之張廣才嶺東土山子爲界西北以吉林府境之奔樓頭嶺爲界東西三百二十餘里南北二百二十里惟南境之地前以奉吉省界未清猶懸其址事關締造不得不以審慎出之也至於保衛治安之策則又以巡警爲入手辦法前由韓登舉召募練勇分地駐紮聞有匪警互相追勦法非不善然稱爲會勇不歸官家節制非政體也慶璋往議設巡警民意初扞格不相入旋飭開忱諭導就會勇中選其精悍者改充巡警即飭韓登舉爲教練長練習警章分佈各區偵邏備至晝夜罔間使匪徒無從溷迹舉境奠安蚩蚩者氓乃知改絃更張仍爲彼等身家

起見始帖然洽服並使登舉知官家權限不得有非分干越而棄瑕用材亦未嘗無鼓舞之方以納於正軌所謂因勢利導其理然也復經慶璋設有勸學所簡字學堂師範傳習所兩等學堂各一所均因陋就簡粗具規模藉資觀感總之該處縣治既定夾皮溝上下游易榛莽爲膏腴不致貽謾藏之誨入游民於版籍不致有梗化之虞固固實邊此其要鍵若夫十年生聚十年教訓循序以圖是又在賢有司之克善其事者

紀韓登舉事實

韓登舉本山東登州府人其祖父効忠初來至復州備役於侯姓家以賭博失敗逃
赴夾皮溝盜採金礦一二年間聲勢漸廣結異姓五十餘家爲弟昆招集墾丁礦夫
至四五萬人經營實業資其生計流氓多歸之俗稱爲韓邊外時有馬賊來襲礦効
忠擊敗之遂雄一方自榜其門曰威鎮江東時官家苦地土廣漢兵不敷設因擬牢
籠之以利其用督辦齊古塔等處事宜吳大澂書安分務農區額易其門榜効忠死
子受文羸弱且庸愚力不能奮衆係登舉乃代承其業光緒甲午庚子間均充練總
以衛其地防匪安民頗能出力洊保至都司加花翎於是夾皮溝一帶居民之訴訟
者營業者開礦者悉願受練總之裁處亦小民之耳目習慣使然也三十三年秋檄
其充帶練勇偵勅夾皮溝西南一帶歸匪事竣聞於

朝獎以參將補用俾鼓舞其功名之心卽潛消其匪測之志嗣以該處設治增置巡警
擬即飭登舉爲教練長徇民之望卽責成以衛民之事是一舉而兩便焉又其在夾
皮溝斂收會金之法每年四月八月向金幫每戶索金六兩商鋪每家二三四兩不

等把頭一名納金一二錢礦丁一名納金二三四分不等耕地一晌納糧六斗至一石二斗不等伐木百株抽十成之一獵虎捕鹿種參採藥均按值收費是以日人目爲稅額而邊外獨立國之說所由起也

紀新舊礦洞地勢

夾皮溝爲產金之區礦洞林立中國夙未講求礦學無實地勘驗確識憑土人一知半解以爲冥索之導致開濬未半而或與苗歧或爲水阻中途輟手貲本虧耗幾盡迨另易地位卽幸有所得而終歎前失之難償比比然也夾皮溝在萬山之中山形環曲如盤東倚金銀鑿嶺西迄老營場之渭沙河計長三十五里南至四道溝前嶺北倚五道岔帶山計寬二十餘里其水西南入渭沙河由老營場曲折東行依夾皮溝河右岸歷頭二三四五道岔其左岸則頭道溝山梁老西溝大豬圈穹棒溝岔頂子小南溝也各溝共約積七八百方里溝內砂石翻騰如邱如阜蓋皆砂金採竭之區土人所指爲廢硯者而現今新硯在熱鬧街之上游相距里餘金銀鑿嶺之西三里餘名老硯硯又曰八人班硯北向高六尺餘寬七尺餘層級向東南下十八級稍平十餘步又向南斜下二十四級轉西南數十步折而東北硯窄僅容二人往來環曲數十步忽高聳約十餘尺行當僂僂而上復下斜坡如梯十餘步硯寬七八尺平如窄巷百餘步炭氣薰騰幾不可耐忽寬大如廳堂乃修鑿石之鑿鐵匠鑪也下斜

坡十餘步氣息稍涼硿高如房又下斜坡數十步見鑿礦砂之處高丈餘寬三丈餘白石壁立即係近今採金之所要之該礦地勢據靈秀鍾毓之區占奧衍曲邃之勝礦藏宏富實有可徵惜商民不能厚其財力采用西法以恢張事業徒令於山石犖确之中僅收夫事勞功半之効然而小民恃此鬪口者夫亦夥矣

附採金土法

夾皮溝業採金者名曰金幫其鋪號曰玉盛發公正興馬架子興順堂泰和成楊成富福興永義興和韓受恒等十家每家工人七八十名碾礦之盤各四五六具不等共石碾五十一具每具每日均計得金六七錢少則一二錢不等或遇極旺之苗每碾每日有得金一二兩者但不多見耳其探鑿碾煉之法工人用寸徑長三尺之鐵槓一人扶之另二人輪流執巨鎚重二十餘斤者擊成孔塞以火藥轟成碎塊另由工人擇白石中有鐵硫色之砂裝入藤袋肩負而出堆置洞旁成堆再由鑿砂人敲去白石餘砂分作十股各用牛車運回鎚碎如桃如豆入碾成粉亦有加水濕碾成漿者另用長方木盤斜置水旁缺其下口用杓取礦漿入盤放長流水淘洗多次得青綠帶黑之細礦砂冉入淺窄長方中凹小木盤以清水浣之搖拽以別清濁用吸鐵石攝礦內之鐵屑始得淨金粉其色青黑微黃每兩入爐鑄淨金九錢大指如此各家碾淘之後遺棄之砂另有工人拾取用磨重研用水沖洗每日每人亦得金一二分不等其泥水入河積成淤土仍有人用水撒潑亦能得金此可見作工太拙淘

洗未精以致獲利較微其礦中費用日需水夫七十餘人需工錢百餘緡一經水漲尤屬危險用人須十倍之糜款亦層累以加每年工人執藝三百五十日終歲作苦固係我民能力而民生困苦亦由斯可見